



**Broj:** 02-04-1071/23

**Datum,** 04.09.2023. godine

## **ZAPISNIK** sa 29. redovne sjednice 7. saziva Općinskog vijeća Doboј Istok

Dvadesetdeveta redovna sjednica 7. saziva Općinskog vijeća održana je dana 28.09.2023. godine u zgradi općine Doboј Istok u Klokočnici sa početkom u 10,00 sati.

**PRISUTNI:** 17 vijećnika, Kemal Bratić, općinski načelnik, Omer Hadžić, savjetnik općinskog načelnika, Arnela Aljić, ovlaštena državna službenik da obavlja poslove sekretara općine, Sulejman Delić, pomoćnik općinskog načelnika za civilnu zaštitu, Anel Osmić, predstavnik Sportskog saveza općine Doboј Istok i Fahrudin Kurtović, predstavnik Televizije Tuzlanskog kantona.

Sjednicu je otvorio i vodio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Prije nego što krenemo sa sjednicom da utvrdimo prisutnost vijećnika. Znači prisutno je svih 17 vijećnika. Poštovani vijećnici, uvaženi načelnice, pomoćnici načelnika, mediji, sekretaru, tehnički sekretaru sve vas srdačno selamim i pozdravljam.“

### **USVAJANJE ZAPISNIKA SA PRETHODNE SJEDNICE OPĆINSKOG VIJEĆA**

Nusret Dautović, predsjedavajući Općinskog vijeća: „Dobili ste Zapisnik sa prethodne sjednice Općinskog vijeća. Ima li neko primjedbi na zapisnik? Ukoliko se niko ne javlja, ko je za ovakav zapisnik?“  
 Glasanje: ZA – 17, PROTIV – 0, UZDRŽANIH – 0.

### **VIJEĆNIČKA PITANJA**

Nusret Dautović, predsjedavajući Općinskog vijeća: „Izvolite?“

Senada Džanić, vijećnica SBB: „Sve vas srdačno selamim i pozdravljam. Moje prvo vijećničko pitanje odnosi se na načelnika općine. Postoji li mogućnost da se vjenčanja u zgradi općine obavljaju radnim danima i danima vikenda besplatno ili uz minimalnu novčanu naknadu? Obrazloženje: S obzirom da veliki broj mladih sudbonosno da, sam čin vjenčanja, zbog velike razlike u cijeni odlučuje da uradi u gradu Doboju, mišljenja sam da bi bilo dobro iznaći mogućnost da se i danima vikenda čin vjenčanja u našoj općini obavlja besplatno ili uz minimalnu novčanu naknadu kao što je u gradu Doboju. Običaj je darovati mladence, pa eto prilike da i općina, ako ne daruje, da bar tako pokaže dobru volju za sretan bračni život. Drugo vijećničko pitanje: Postoji li mogućnost izgradnje zaštitne ograde na lokalnom putu u Stanić Rijeci od kuće Nihada Delića, pa sve do kuće Muhameda Bradarića? Obrazloženje: Nakon što je došlo do radova na lokalnom putu u Stanić Rijeci, asfaltiranja, zbog nestručnosti, neodgovornosti i neispunjavanja svega predviđenog projektom ili iz nekih drugih razloga došlo je do niza propusta. Ja ću izdvojiti da nije postavljena zaštitna ograda na ovom dijelu puta, kao ni saobraćajni znakovi, a takođe nije iscertana treća bijela linija. Sa lijeve strane, govorim o ulazu u Stanić Rijeku, s obzirom da je uz samu ivicu iscertana bijela linija, a nema zaštitne ograde ugrožena je bezbjednost i sigurnost svih učesnika u saobraćaju, a nas Stanoriječana svakodnevno.“

Emira Karić, predsjednica kluba vijećnika SDP: „Srdačno bih pozdravila sve prisutne. Takođe bih izrazila zadovoljstvo zato što je prihvaćen moj prijedlog sa sjednice Kolegija da se osim na svečanim sjednicama i na radnim sjednicama prije početka pušta himna. Vjerujte mi ima svoju simboliku i ima svoje zašto. Ja sam za ovu sjednicu pripremila dva vijećnička pitanja i jednu vijećničku inicijativu. Prvo vijećničko pitanje. Ovo vijećničko pitanje postavljam Savjetu mjesne zajednice Brijesnica Mala: Da li je Savjet mjesne

*zajednice donio odluku o iznajmljivanju dijela svojih prostorija firmi „eMagnetix software tech“ doo Brčko. S razlogom postavljam ovo pitanje, jer sam vidjela i sama određene reklame na prostorima mjesne zajednice Brijesnica Mala upravo ove firme. Takođe i na internetu pronašla sam neke klipove koji obavještavaju građane da se mogu javiti na posao vezano za ovu firmu. Zapravo u pitanju je bilo neko lajkanje i za to lajkanje će biti isplaćeni određeni iznosi i naravno kada vidim takve stvari samo mogu reći naučna fantastika. Zato se pitam ako je Savjet donio odluku da da prostorije zaista u budućnosti treba razmisliti, jer to je nekoliko članova i nije jedan član koji razmišlja. Treba dobro razmisliti o kojoj se firmi radi, koja je djelatnost te firme itd. Žao mi je što je državna imovina u ovom slučaju bila upletena u neke internetske prevare. Samo ako je dala odluku da ubuduće svi savjeti na određene načine kada izdaju neke prostore malo se više informišu o čemu se radi. Što se tiče drugog vijećničkog pitanja ovo vijećničko pitanje postavljam načelniku općine Doboj Istok. Postoji li određeni kriterij, pravilnici, odluke i sl. ko može predstavljati delegaciju ispred Općinskog vijeća kada su u pitanju posjete naše općine određenim državama? Takođe interes nam je izgleda enciklopedija znanja postala i ja sam vidjela da su neki članovi Općinskog vijeća posjetili državu neku, evo neću licitirati o čemu se radi i ono što mogu zaključiti ako su oni predstavnici Općinskog vijeća, odnosno delegacija ispred Općinskog vijeća, onda je odgovor na moje pitanje i sama ću ga sebi odgovoriti, a to je članska karta SDA. Ako je to kriterij onda se ovdje, načelnice, radi o diskriminaciji. Ja se izvinjavam članska karta SDA i zvati se Izet Hodžić i to je jedini pravilnik. Ako su to vaši drugovi, pa ste vi njih pozvali ja se izvinjavam na ovom pitanju. Ako je to zvanična delegacija, a po onome što smo mogli vidjeti ovdje se radi o diskriminaciji. Imam i vijećničku inicijativu. Ovu vijećničku inicijativu upućujem Policijskoj stanici Doboj Istok. Ona se odnosi na postavljanje stacioniranog radara na području općine Doboj Istok. Obrazloženje: Magistralni put Doboj – Tuzla smatra se jednom od najprometnijih cesta u Bosni i Hercegovini. U Tuzlanskom kantonu postoji samo jedan stacionirani radar, na primjer u Zeničko-dobojskom kantonu ima 6, u Unsko-sanskom kantonu ima 22 stacionirana rada, a u Zapadnohercegovačkom kantonu ima 12 stacioniranih radara itd. Razlozi podnošenja ove inicijative se svakodnevno ogledaju. Budući da je općina Doboj Istok uglavnom naseljeno mjesto i sami saobraćajni znakovi obavještavaju vozače o dozvoljenim brzinama, evidentna su konstantna prekorajčenja u manjoj, ali sve češće i u većoj mjeri. Stacionirani radar imao bi za cilj kako preventivnog tako i represivnog djelovanja na vozače koji upravljajući vozilima čine prekršaje prekorajčenje dozvoljene brzine. Nabavka jednog radarskog uređaja sa pratećom opremom košta oko 40.000 KM što ne smatram velikim udarom na bilo čiji budžet. Pošto sam se informisala ako je u pitanju broj saobraćajnih nezgoda da bi se taj stacionirani radar postavio evo ja mogu za potez od ulaza u Malu Brijesnicu do mosta, odnosno do Velike Brijesnice, reći da je u posljednje dvije godine bilo i evo ja znam za 15 saobraćajnih nezgoda i jedna je bila sa smrtnim izhodom. Sada smo u mjesecu avgustu imali upravo na tom potezu u 24 sata dvije saobraćajne nezgode. Smatram da je ovo krucijalno pitanje postavljanje stacioniranog radara da se može isposlovati, da tako kažem, samo sve zavisi od nas. Ako prihvatite inicijativu hvala, ali se ona mora i realizirati, jer ako se ona prihvati, a ne realizira ja ću koristiti još neke demokratske metode, a o tome ćete biti naknadno obaviješteni.“*

*Nusret Dautović, predsjedavajući Općinskog vijeća: „Prvo vijećničko pitanje je bilo vezano za mjesnu zajednicu Mala Brijesnica i možda je to pitanje trebalo biti upućeno u mjesnu zajednicu i ne znam zašto je ovdje izneseno kada se može bez Općinskog vijeća uputiti mjesnoj zajednici. Mislim da je bespotrebno to pitanje izneseno ovdje. Pitanje je na mjestu, ali ga je trebalo uputiti Savjetu mjesne zajednice Mala Brijesnica.“*

*Emira Karić, predsjednica kluba vijećnika SDP: „U pravu ste, predsjedavajući, međutim nisam htjela postaviti pitanje isključivo mjesnoj zajednici da bi samo dobila odgovor i da bi tu bio kraj. Nego sam postavila pitanje ako je to tačno, što pretpostavljam da jeste, onda bi trebalo ostalim mjesnim zajednicama, a imamo ih, ipak uputiti neki dopis da ukoliko se neko prijavi za iznajmljivaje prostorija da se malo studioznije razmisli kome se izdaju te prostorije.“*

*Kemal Bratić, općinski načelnik: „Prije svega ja bih zamolio uspješan rad, jer vidim da su baterije napunjene i bit će dobrih odluka. Ja bih želio da iskoristim ovu govornicu da postavim pitanje federalnoj vladi i vijeću ministara. Upoređujem to sa ovim pitanjem za savjet mjesne zajednice. Zamolio bih predsjedavajućeg da se ova govornica ne zloupotrebljava, jer svi znamo ako nekome upućujemo pitanje kako ga trebamo uputiti, dovoljno smo pismeni. Pokušat ću odgovoriti na neka pitanja. Kada se radi o prvom pitanju vezano za vjenčanja mislim da je pogrešna adresa, jer ne donosi načelnik odluku o vjenčanjima, niti o taksama za vjenčanja. Kada se radi o drugom pitanju radi se na tome i naravno da mislim na sigurnost naših građana i gledat ćemo u narednom periodu da se postavi ta ograda. Kada se radi o inicijativi uvažene vijećnice Emire, slažem se potpuno i ja predlažem da bude pet radara, jer bi na taj način možda riješili te probleme koje imamo. Malo je jedan, a vi ste se samo bazirali na jednu mjesnu zajednicu, a svugdje je problem. Znači gdje ga odrediti i kako ćemo izvagati gdje je najjača frekvencija kada je magistralni put i automobili ulaze od ulaza u općinu*

Doboj Istok do izlaza i obratno. Ja mislim da nije dovoljan jedan i ja mislim da bi trebalo da bude najmanje pet radara da bi sve probleme riješili, a da ne ulazimo u druge detalje kako ko vozi i da imamo problema i sa ovim priključnim vozilima kojih hvala Bogu ima kod nas, jer ljudi rade, siju, oru itd. Nije naša nadležnost i mi možemo podnijeti inicijativu prema Ministarstvu unutrašnjih poslova i ono što ja znam je da je to nekada pokušano da se stavi. Međutim stavljena je ova jedna pametna kamera na zgradi u Velikoj Brijesnici i mislim da ona nije dovoljna, ali nemojte da nešto predlažemo što mi ne možemo provesti, mi se ne pitamo. Valjda postoje ljudi iz struke koji rade na takvim stvarima. Ja opet ponavljam, mislim da nije dovoljan jedan i da treba najmanje pet radara na pet frekvencija gdje je najgušći saobraćaj, gdje su škole, gdje su izlazi ili nekakve raskrsnice kojih ima na području naše općine.“

Izet Hodžić, zamjenik predsjedavajućeg Općinskog vijeća: „ Poštovane kolege i kolegice vijećnici i vijećnice, uvaženi načelnice sa saradnicima, poštovani gosti, predstavnici medija, savjetnice i sekretaru i tehnički sekretaru želim sve da vas poselamim i pozdravim. Svima nama želim uspješnu današnju sjednicu Općinskog vijeća. Iskreno mislio sam da se ne javljam, jer načelnik je većinu stvari rekao što se tiče vijećničkog pitanja koleginice Senade Džanić vezano za vjenčanja. Vjerujte sličnih smo razmišljanja i kada vidim na ovim društvenim mrežama objavu da se vjenčanje dogodilo u susjednoj općini iz drugog entiteta i najčešće su takve objave, nije baš svejedno. Ovo govorim iz srca, iz dna duše i neke aktivnosti sam i pokrenuo. Znači načelnik je rekao da nije do njega i tako i jest. Ovo je Odluka o visini administrativnim taksi koje donosi Općinsko vijeće, a vezano je i za vjenčanja. Ja sam par svojih prijatelja i rođaka htio da pitam zbog čega su se vjenčavali i dobio sam različite odgovore. Znači na Općinskom vijeću je da donese izmjene tih naknada i način na koji se to radi, zakazivanje termina i svega ostalog. Bilo bi ružno da kažem i da upirem prstom, ali znači trebamo promovisati našu općinu i naše službe. Ima različitih razloga zbog čega se to radi u općini Doboj i kada se dođe do tih razloga nije to samo visina naknade i nije to samo radni ili neradni dan. Razlozi su i dobijanje tih vjenčanih listova i mogućnost kada, šta i kako. U većini, daleko od toga da branim bilo koga, a u ovom slučaju instituciju Općinskog vijeća, trebamo uzeti i pregledati tu odluku i vidjeti šta se može. Ja znam da je moguće radnim danima i da je to simbolična naknada u visini od 5 KM, kolegice Senada. Ja bih možda predložio da mi tim mladim bračnim parovima damo naknadu kada se vjenčaju, možda u visini 50 ili 100 KM. Kažem ja sam skoro imao razgovor pukom slučajnošću je bio moj rođak i pitao sam ga, htio je da bude za vikend da se vjenča, žena mu dolazi na jedan dan iz Njemačke i to je bio jedini razlog. Ne bih da zloupotrebjavam ovu govornicu, pa po ovom pitanju toliko. Što se tiče pitanja koleginice Emire vezano za vijeće mjesne zajednice Brijesnica Mala, evo dok ste vi iznosili to pitanje, rekli ste vijeću mjesne zajednice i od koga očekujete odgovor, jer po ovom konkretnom pitanju treba da bude odgovor. Ja smatram da i ja, kao i svi vi ostali građani, ako živim na području mjesne zajednice Klokotnica i ako nešto nije u redu i imam takvih situacija i prilika, upućujem savjetu mjesne zajednice. Znači, ako imam priliku da uputim pohvalu, uputim pohvalu i ako imam priliku da argumentovano to potkrijepim upućujem i kritiku. Nisam ja najbolje razumio, je li neko treba proslijediti vaše pitanje savjetu mjesne zajednice ili ste vi htjeli neki dodatni prostor za reklamu? Ne znam šta je po srijedi, a možda je ovo drugo najvjerojatnije ili da nekoga diskreditujete. Ovo najozbiljnije govorim ako budemo nastavili u ovom trendu mislim da ćemo najmanje posvetiti pažnje i vremena onim stvarima suštinskim kojima treba da se bavi ova institucija zvana Općinsko vijeće, znači tačkama dnevnog reda. Doći ću i ja sutra sa 5 ili 10 vijećničkih pitanja i normalno niko ih ne cenzuriše, niko ne gleda šta je i ja ću uputiti pitanje, ne znam, lovačkom udruženju mada bi to iza ove govornice i bilo svrsishodno ili nekome sportskom klubu i bježat ćemo od stvarnih pitanja kojima treba da se ova institucija bavi. Nije mi jasno da li treba određena služba općinske administracije da proslijedi to pitanje, a od koga ćemo dobiti odgovor.“

Zerina Subašić, predsjednica kluba vijećnika PDA-Nezavisna lista Doboj: „ Da vas sve poselamim i pozdravim. Samo da kažem kratko što se tiče zaštitne ograde na našem asfaltu u Stanić Rijeci. Mjesna zajednica je kupila branike i u toku je postavljanje, pa da se ne bi neko kitio tuđim zlatom da kažem.“

Emira Karić, predsjednica kluba vijećnika SDP: „Ako je poenta da imamo zapisnik na dva lista i da traje 10 minuta sjednica možemo nastaviti od sljedeće sjednice u tom tonu. Upravo zbog ovih stvari javila se vijećnica koja je pokušala odgovoriti na vijećničko pitanje. Ja smatram da sam ovdje trebala dobiti najbrži odgovor i ako pratite Poslovník i Poslovník kaže da se na vijećničko pitanje odgovara usmeno ukoliko ja ne tražim izričito pismeno. Budući da znam da je sekretar mjesne zajednice Brijesnica Mala ovdje on meni najbrže može odgovoriti na ovo pitanje. Evo toliko o odgovoru.“

Nusret Dautović, predsjedavajući Općinskog vijeća: „ Izvinite vijećnice, ali ovo nije mjesto da vijećnik odgovara, jer to je pitanje za mjesnu zajednicu. Ovo nije mjesna zajednica, ovo je Općinsko vijeće i nemojte zloupotrebjavati govornicu. Nemojte, molim vas.“

*Emira Karić, predsjednica kluba vijećnika SDP: „Mjesna zajednica pripada Marsu. Dobro, idemo dalje, prelazim preko ovoga. Načelnice, rekli ste pet radara, a kada govorite o pet radara ja ne znam da li vi nas pokušavate ovdje nasmijsati. Ako kažem da je jedan radar na području Tuzlanskog kantona, a vi onda kažete najbolje bi bilo pet radara. Ja sam iskreno zadovoljna sa jednim stacioniranim radarom. Ako to isposlušemo, isposlovali smo veliki veliki posao. Ko živi na magistralnom putu i čija je kuća na magistralnom putu zaista preko ovih stvari neće prelaziti. Vjerujte mi da postoje vozači u određeno vrijeme dana ili noći i tačno se zna kada je policijska patrola na cesti i to ja dobro vidim sa pozicije gdje živim, ali kada nije, vjerujte mi da bi vozači formule 1 pojedinim zavidjeli. Bojim se smrtnih ishoda, ali izgleda da su se ljudi naučili paziti na tom dijelu magistralnog puta i evo, hvala Bogu, imamo i trotoare, pa je to velika i olakšavajuća prednost i sigurnost za naše građane. Smatram da se pošto je najopterećeniji put može isposlovati da preko Vijeća idemo, a vi ćete se izjasniti da li ide Policijskoj stanici, a oni prema ministarstvu i ja taj put ne želim da znam kako ide dalje. Kažem isto tako ako ne želi Vijeće, postoje demokratski oblici gdje se mogu upućivati određene stvari samom ministarstvu.“*

*Senada Džanić, vijećnica SBB: „Krenut ću od replike zamjeniku predsjedavajućeg, kolegi Izetu. Ako je u nadležnosti Općinskog vijeća, ovo je prava adresa. Ako su vjenčanja, a jesu, ovdje je matični ured, u nadležnosti Općinskog vijeća, dajte predsjedavajući da na jednoj od narednih sjednica kroz pravilnik, odnosno izmjene pravilnika o činu vjenčanja idemo sa tačkom dnevnog reda i da iznađemo mogućnosti da nam se mladi ne vjenčavaju u susjednom gradu Doboju. Ako postoji problem oko papirologije, dajte da vidimo kako su to riješili u drugim općinama, odnosno gdje se to može pojednostaviti. Ovo govorim iz razloga što sam sretna kada se vjenčanje desi ovdje u općini. I ja sam imala vjenčanje u ovoj sali i mislim da je drugačije ako se radi o našim mladim, pa možda na toj tački ako se pronađe mogućnost da se svim mladim bračnim parovima dodijeli neka simbolična nagrada. Jedina mi je namjera bila u ovom svemu da naši mladi ne odlaze u druge gradove da bi obavili čin vjenčanja zbog pojednostavljene papirologije ili u današnjem vremenu i ovako teške ekonomske situacije zbog, kada je u pitanju vikend, ogromne razlike u cijeni. A opet uzmite od sebe svi koji ste se vjenčavali, govorim o 90% zbog zvanica i uglavnom mislim da ste shvatili šta sam htjela reći. Ovo što kolegica Zerina govori ja sam sinoć razgovarala sa dva člana savjeta mjesne zajednice i od Zerininog oca je i kupljen jedan dio ograde koji treba da bude postavljen. Međutim, ovo što sam ja navela u vijećničkom pitanju nemoguće je da se postavi od kuće Nihada Delića do kuće Muhameda Bradarića, jer neće biti dovoljno sredstava ni ograde. Ono što želim da podijelim sa vama da ako ste imali priliku od kada je urađen asfalt da dođete u Stanić Rijeku, vjerujte mi ja svakodnevno svom djetetu i svima kojima mogu govorim pazi, stani, ne idi, jer se bijela linija nalazi uz samu ivicu. Ovo nije traženje nečega da bi se dobili politički poeni i nemojte da nam opomena bude kada se bude desilo ono najgore, ne dao Bog. Znao da nemamo saobraćajnih znakova, znate da nema ograničenja brzine i znate da raskrsnica na kojoj smo govorili da smo imali smrtno ishoda još uvijek nije urađena. Dajte molim vas, čisto govorim iz razloga ako može i pitam ima li načina da se u kompletnom tom dijelu uradi, jer je prošlo jako puno vremena od kada je postavljen asfalt da nije urađeno i opet ne može biti urađeno u onom dijelu u kojem je potrebno.“*

*Nusret Dautović, predsjedavajući Općinskog vijeća: „Uvažena vijećnice, na većinu vaših pitanja je već odgovoreno. Nije uopšte problem vrijeme, jer mi možemo ovdje cijeli dan i mene što se tiče možemo koristiti i pauze tako da nas ne morate na to upozoravati. Na vaše pitanje je već odgovoreno i ja sam mislio da hoćete nešto drugo, jer načelnik je odgovorio tako da se ne mora po istom dva puta izlaziti i umarati nas, a nećete nas umoriti.“*

*Kemal Bratić, općinski načelnik: „Dužan sam odgovoriti na jedno pitanje vezano za posjetu bratskoj općini. Vi ako niste znali poziv dolazi na načelnika da posjeti sa svojim saradnicima i kada budete moj suradnik rado ću vas povesti bilo gdje kada budem išao. To vam je odgovor na pitanje i neki ovdje znaju kako to ide, a Statut je rekao i Zakon o lokalnoj samoupravi ko predstavlja općinu. Kada se radi o ovome pitanju, ovo pitanje je duboko. Izet je govorio, a govorili su još neki vezano za vjenčanja. Ne mogu ja nekoga natjerati da voli svoju općinu. Da je moje dijete to uradilo ja bih mu obje noge polomio. Da je osam puta skuplje vjenčanje u općini u kojoj je on rođen, u kojoj je odrastao, završio osnovnu i srednju školu i onda da ode da se vjenča u drugu općinu, vjerujte da to ne bi smio uraditi. Ovdje se radi o nečemu drugom. Ponavljam, ne možemo mi nekoga natjerati da voli svoju općinu. Ja vam tvrdim da je u ovoj godini do sada bilo najviše vjenčanja na području općine Doboj Istok. Donijet ću vam podatak. Kada se radi o taksama, nije to ogromna razlika. Znači možeš se vjenčati kao kada dođeš u trgovinu, možeš kupiti skaj kolu, a možeš kupiti original, tako se možeš vjenčati za 5 KM, možeš za 50, a možeš i za 250 KM i do nas je šta ćemo izabrati. Oslobodili smo skoro svih tih taksi i to govori odluka o taksama, a to su isključivo prihodi naše općine. Kada se radi o vikendu, nije to samo da matičar dođe, tu je i pomoćni radnik, jer mi uzimamo dan nekome i neko to mora platiti. Hoće da se vjenča mimo radnog dana, bujrum plati. Ja sam svoje dijete vjenčao mimo radnog dana i uplatio taksu*

250 KM. To nije skupo. Znači mi smo angažovali 2 – 3 čovjeka da rade taj dan i iznijeli knjige i preuzeli rizik na sebe. Ko god hoće da se vjenča u Doboju, neka se vjenča u Doboju, jer mi to nećemo ni ovim taksama to izmijeniti. Evo da ukinemo skroz takse, nećemo izmijeniti ako je neko naumio da se vjenča negdje drugo, ja vam garantujem. Ovdje se radi o patriotizmu i svako ko misli da treba tamo da se vjenča, bujrum neka se vjenča. Opet ponavljam, nije adresa načelnik i vidi se da su neki dugo odsutni i da ne znaju čija je nadležnost administrativna i druge općinske takse.“

Izet Hodžić, zamjenik predsjedavajućeg Općinskog vijeća: „ Nemojte me 100% držati vezano za takse, ali 5 KM, u radno vrijeme radni dan, 50 KM radni dan van radnog vremena i vikend lokacija zgrada općine Doboj Istok 250 KM neradno vrijeme i vikend, znači u dislociranom prostoru gdje mladenci traže. To su trenutne takse koje važe za područje općine Doboj Istok. U potpunosti se slažem, iskreno volio bih da je situacija drugačija. Mislim da visina taksi nije presudna u donošenju odluka kod ovoga.“

Hasan Hasančević, predsjednik kluba vijećnika SDA: „ Uvaženi predsjedavajući, zamjeniče, načelniče sa saradnicima, kolegice i kolege želim iskreno da vas poselamim i pozdravim. Mislim da je predizborna kampanja krenula na koji način sami ćemo prosuditi. Reći ću dvije tri stvari oko vijećničkog pitanja za vjenčanje ne kao predsjednik kluba vijećnika SDA nego kao Hasan Hasančević, a vi ćete to shvatiti kako god hoćete i kako god sebi hoće. Kada pravimo bilo kakvu ceremoniju, pravimo troškovnik i u tom troškovniku se redaju stavke jedna po jedna. Ja pitam kolegice i kolege i sam sebe koliko taksa od 5 KM ili od 250 KM učestvuje u ukupnom koštanju svadbe koju mi pravimo nema veze gdje? Jedna kutija cigareta je 5 KM, mislim da je 5 KM, jer ne pušim. Takav populizam, takva pitanja, a svi se mi gledamo na slikama ili fotografijama, kako hoćete, jer smo zajedno maltene na istim vjenčanjima, pa vidimo alkohola se popije 20.000 KM. Ima pravo, ženi se. Muzika 5.000 KM ili 10.000 ili 500 KM i niko ne kaže skupo. Neću reći ni da ovo skupo ili nije, ali de da razmislimo o čemu pričamo. Gdje mi to ulažemo pare? Kuda ide tih 5 KM? Nije problem dati i evo porezat ćemo se mi ako je to tako. Sergija i sve može, nije problem. Još jedno što me boli kod postavljanja vijećničkih pitanja kada kaže nestručnim radom prilikom izvođenja radova u mjesnoj zajednici Stanić Rijeka. Uvažene kolege i kolegice, naša firma koja je izvodila te radove je oličenje firme u Federaciji BiH koje izvode tu vrstu radova. Ne vjerujem, da zlo bude veće, da bi neko nestručnim radom u svom rođenom mjestu napravio propust koji se navodi ovdje za ovom govornicom. Alasalamet. Kao predsjednik kluba tražim pola sata pauze.“

Nusret Dautović, predsjedavajući Općinskog vijeća: „ Dajem pola sata pauze.“

Sjednica je nastavljena u 11,10 sati.

Nusret Dautović, predsjedavajući Općinskog vijeća: „ Nastavljamo sa sjednicom, na tački smo vijećnička pitanja.“

Amir Mašić, vijećnik SDA: „ Obzirom da se javljam prvi puta sve vas selamim i pozdravljam. Pozivam kolegicu Karić da me snima javno i da objavi gdje je naumila. Prvo ću vam datu uputu što se tiče vašeg pitanja vezano za izdavanje podzakup prostorija mjesne zajednice da se pismenim zahtjevom obratite savjetu mjesne zajednice i svakako ćete dobiti odgovor. Evo da najavim inicijativu za sljedeću sjednicu Općinskog vijeća, a tiče se Osnovne škole „Brijesnica“ i Mješovite srednje škole Doboj Istok vezano za period od maja 2021. do juna 2022. godine, a vezano za dijeljenje školskog namještaja i uglja bez odluke organa upravljanja.“

Emira Karić, predsjednica kluba vijećnika SDP: „Ja bih prvo repliku vezano za patriotizam što je govorio naš načelnik. Postavljam evo pitanje: Ako je u pitanju baš takva principijelnost da li općina, odnosno da li se iz budžeta općine Doboj Istok izdvajaju ikakva sredstva putem Javnog komunalnog preduzeća toj istoj općini, općini Doboj? Ako smo principijelni onda sve stvari radimo po principijelnosti. To sam jednom i pitala i meni stvarno nije problem i da patriotizam je na prvom mjestu, ali isto tako ide zajedno sa suverenitetom Bosne i Hercegovine. Tako da izdvajati ono što ste vi izjavljivali po meni nije neka logika. Što se tiče inicijative vijećnika koji je prethodno imao tu inicijativu prvo ta inicijativa mora biti u pisanoj formi, ako si već izašao za govornicu. Ja ne vidim kod vas da je bilo šta predao u pisanoj formi, što znači da ste mu isto tako dozvolili da vrši radnje koje nisu u skladu sa Poslovnikom i svim što smo mi donijeli. Znači on je trebao tačno precizirano reći svoju inicijativu o čemu se radi itd. Isto tako ja najavljujem vijećničku inicijativu o osnovnoj školi za period od jula 2022. do septembra 2023. godine. Ako je to problem, ja se radujem toj inicijativi zato što ću kroz tu inicijativu iznijeti ostale stvari koje su bile u tom periodu. Naravno, imat ću inicijativu vezano za školu za period 2022. do septembra 2023. godine.“

Nusret Dautović, predsjedavajući Općinskog vijeća: „Hvala lijepo, Emira. Potpuno isto ste uradili i vi i Amir, a ja nisam znao šta će Amir reći. Kritikuju, a onda uradite potpuno isto, jer niste ni vi za ovu, nego za sljedeću, kao i on. Znači ako kršite, isto ste prekršili u ovom trenutku. Dobro ako namjerno, možda je i on namjerno i ne mogu više prosuđivati ko je šta namjerno.“

Senada Džanić, vijećnica SBB: „ U jednom dijelu načelnik se osvrnuo i vezao je patriotizam za novac i ja mislim da ne možemo svi pokazati kolike smo patriote kroz novac, jer u ovako teškoj ekonomskoj situaciji ne bih da se veže patriotizam i novac. Što se tiče kolege Hasana Hasančevića i ovoga što je kolegica Zerina rekla godina dana je prošla od kada je urađen asfalt u Stanić Rijeci. Rekla sam vam i znate da je to tačno da su svakodnevno građani Stanić Rijeke izloženi opasnosti i ugrožena je sigurnost i bezbjednost građana. Ja vas molim iz razloga neki dan smo imali da je jedno dijete srećom izbjeglo nesreću što je uspjelo baciti biciklo zato što je slijedilo tu liniju kada je naišao auto. Ja vas molim i hvala mjesnoj zajednici Stanić Rijeka što kreće, a urađeno je samo nekoliko metara zaštitne ograde i ja vas molim ukoliko ne bude u mogućnosti da se iznađe mogućnost, jer kažem ugroženi su životi svih građana, a naročito Stanoriječana. Što se tiče kolege Hasana Hasančevića ja ni u jednom momentu nisam pomenula izvođača radova, ni u jednom momentu. Znači možemo pogledati poslije. Nestručnost, neogovornost, neispunjavanje svega predviđenog projektom ili iz nekih drugih razloga. Ja ne znam koji je razlog da građanima nisu urađene ograde koje su bile, a rečeno je da će se ponovo uraditi. Koji je razlog zašto nisu postavljeni saobraćajni znakovi? Koji je razlog zašto nema treće bijele linije? Govorim vam ovo iz razloga što sve nekako što dolazi od strane opozicije gleda se da se dočeka na nož. Ja živim u Stanić Rijeci i znam da je nama ovo veliki problem. Kada sam u koroni, video linkom je trajala sjednica, zamolila, iako sam se potrudina, dovodila medije i pričalo se o tome da u naselju Haskići imamo problem klizišta i da na današnjem vremenu ti građani ne mogu doći svojim kućama, jer se putna komunikacija prekine. Zamolila sam da se izvede struka samo da se uradi projekat i ponovo je Hasan Hasančević rekao da ja prozivam firmu. Nije tačno. Ja ne znam koliko je uloženo sredstava i šta je bilo predviđeno da firma uradi. Ja samo znam da se ne znam koji put u Haskićima uradi taj put i za 20 dana usljed prvih kiša ti isti građani ponovo ne mogu koristiti taj put i ne mogu doći svojim kućama. Znači da je tada urađen projekat, a od tada je prošlo tri godine, da je urađen projekat ja sam sigurna da bi se uz dobru volju našlo rješenje. Sada ćete vi meni reći radi se na tome, ali je to predug period. Tri godine od tada i ne znam koliko puta pitam vas, evo vijećnike pozicije, kada radite u svojoj kući nešto i kada radite prilaz svojoj kući da li ove godine uložite 5000, pa kiša to odnese i iduće godine opet uložite određeni novac, a znate da to nije trajno rješenje. Svi gledamo da uradimo nešto čestito i domaćinski. Samo znači u ovom dijelu se ne radi domaćinski, a najviše trpe građani Stanić Rijeke.“

Kemal Bratić, općinski načelnik: „ Porediti vjenčanje sa odvozom smeća, ništa više neću reći. Znači mi trebamo biti sretni što smeće ne istresamo na svojoj općini. Ja kada sam govorio o patriotizmu, ja nikada ne bih mogao podnijeti da moje dijete pod nekom zastavom izvrši vjenčanje, a da to nije zastava Bosne i Hercegovine. O tome sam govorio. Ako neko može, to je njegov lični izbor.“

Hasan Hasančević, predsjednik kluba vijećnika SDA: „Zamolit ću tehničkog sekretara da od slova do slova do usvajanja zapisnika do sljedeće sjednice i da ono što smo govorili ovdje da se kaže. Uvažena kolegica je doslovce kazala nestručnim radom ili ne znam čim, znači nestručnim radom izvođača radova. Tako je kazala stenogram postoji. Nebitno je i to je vaš problem, ali kada ste tako fini, a vijećnica ste u Općinskom vijeću Doboj Istok, u Lukavici Rijeci postoji takođe problem rijeke i bezbjednosti djece koja izlaze na cestu, a nikada to niste poduzeli. Meni je drago što ste vi se samo sveli na lokalni nivo i to otprilike i jest vaš nivo, nije nešto više. Drago mi je što se zastupa interes lokalnog nivoa. Ne možete reći da mislite o brizi sve djece u Doboj Istoku kada nije tako. Vjerujte da nije tako.“

Izet Hodžić, zamjenik predsjedavajućeg Općinskog vijeća: „Poštovani predsjedavajući, mislim da mi nećete uzeti zlonamjerno, ali mislim da ovo nije tačka dnevnog reda nego situacija oko postavljanja vijećničkih pitanja i inicijativa. Mislim da se trebamo pridržavati Poslovnika o radu Općinskog vijeća na sjednici Općinskog vijeća da se postavljaju pitanja vijećnička i inicijative i tamo u Poslovniku stoji da onaj kome je upućeno vijećničko pitanje treba da odgovori u minimalnom roku od 30 dana. Nije predviđena diskusija po vijećničkim pitanjima, ali evo pola sjednice, a vidjet ćemo u kojem kontekstu će ići. Znači ja ne vidim potrebe za diskusijama da Općinsko vijeće, upućujem i sam sebi ovu reakciju, da mi raspravljamo 15 – 20 minuta o pitanju koje je upućeno savjetu mjesne zajednice ili pitanju koje je upućeno Policijskoj stanici ili Ministarstvu unutrašnjih poslova. Znači, konkretno, decidno i precizno je to pitanje upućeno i mi trebamo tim institucijama da prosljedimo. Naravno ako smo nadležni da mi prosljedimo savjetu bilo koje mjesne zajednice to pitanje i ne vidim da dajemo i meni ovdje prostor za nekakvu diskusiju koja nema veze sa tim vijećničkim pitanjem. Mislim da govorim i predlažem u duhu zakona, a to je Poslovnik o radu, znači

jednostavno vijećnik izade i preda materijale službi ovdje koja je inicijativa bila i završena priča. Mi smo na toj tački sat i po vremena, a ako oduzmemo pauzu smo sat vremena. Zbog čega? Ja jednostavno ne vidim razloga. Vidim način na koji funkcionišu druga općinska i gradska vijeća da jednostavno nema diskusije, nema neke promocije. Evo izmijenili smo Poslovník i pravilnik o radu i uvrštene su inicijative. Sasvim dobro i sve je u redu. Onaj ko postavlja vijećničko pitanje i inicijativu izade i usmeno postavi i obrazloži, ostavi materijal predsjedavajućem i to je to.“

Nusret Dautović, predsjedavajući Općinskog vijeća: „Hvala lijepo. Po meni smo iscrpili ovu tačku i zaključujem tačku vijećnička pitanja i prelazimo na dnevni red.“

### **USVAJANJE DNEVNOG REDA**

Nusret Dautović, predsjedavajući Općinskog vijeća: „ Za današnji dnevni red bilo je predviđeno 8 tačaka. Imamo dvije tačke za proširenje dnevnog reda, pa ću ih pročitati:

1. Razmatranje i usvajanje prijedloga Odluke o učešću općine Doboj Istok na javni poziv za izdavanje poslovnog prostora u zakup,
2. Razmatranje i usvajanje prijedloga Zaključka o davanju saglasnosti Elektroprivredi BiH za postavljanje niskonaponskog voda u javnu površinu.

Pošto ova prva tačka ide kao odluka ja predlažem da bude tačka broj 1. tako da se ostale pomijeraju, a ova druga da ide kao tačka 10. Ja ću pročitati i dnevni red bi izgledao ovako:

1. Razmatranje i usvajanje prijedloga Odluke o učešću općine Doboj Istok na javni poziv za izdavanje poslovnog prostora u zakup,
2. Razmatranje i usvajanje prijedloga Odluke o obrazovanju Komisije za utvrđivanje prometne vrijednosti nepokretnosti i prava,
3. Razmatranje i usvajanje prijedloga Konačne rang liste za dodjelu stipendija redovnim studentima dodiplomskog studija,
4. Razmatranje i usvajanje prijedloga Odluke o dodjeli stipendija redovnim studentima dodiplomskog studija za akademsku 2022/2023. godinu,
5. Razmatranje i usvajanje Izvještaja o realizaciji budžeta općine Doboj Istok za period januar-juni 2023. godinu,
6. Razmatranje i usvajanje Izvještaja o utrošku sredstava budžetske rezerve za period januar-juni 2023. godinu,
7. Razmatranje i usvajanje Informacije o stanju u privredi u općini Doboj Istok za 2022. godinu,
8. Razmatranje i usvajanje Informacije o uspjehu sportskih klubova u takmičarskoj sezoni 2022/2023. godina,
9. Razmatranje i usvajanje Informacije o provedenim aktivnostima povodom obilježavanja Dana brigade,
10. Razmatranje i usvajanje prijedloga Zaključka o davanju saglasnosti Elektroprivredi BiH za postavljanje niskonaponskog voda u javnu površinu.

Ko je za ovakav dnevni red?“

Glasanje: ZA – 16, PROTIV – 0, UZDRŽANIH – 0 (Zerina Subašić je odsutna).

### **REALIZACIJA DNEVNOG REDA**

- 1. Razmatranje i usvajanje prijedloga Odluke o učešću općine Doboj Istok na javni poziv za izdavanje poslovnog prostora u zakup**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ukoliko se niko ne javlja, ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0. (Zerina Subašić je odsutna).

## **2. Razmatranje i usvajanje Prijedloga Odluke o obrazovanju Komisije za utvrđivanje prometne vrijednosti nepokretnosti i prava**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Niko ne javlja. Ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0. (Zerina Subašić je odsutna).

## **3. Razmatranje i usvajanje Prijedloga Konačne rang liste za dodjelu stipendija redovnim studentima dodiplomskog studija**

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Emira Karić, predsjednica kluba vijećnika SDP: „ Prije diskusije po ovoj tački dnevnog reda, predsjedavajući, kada dođu tačke za proširenje dnevnog reda mi se prvo izjašnjavamo da li želimo te tačke da uvrstimo, a ne pod kojim brojem. Samo za iduću sjednicu. Što se tiče ove tačke Konačne rang liste za dodjelu stipendija redovnim studentima, ja sam zaista ovdje studiozno proučavala materijale. Ja se sjećam našeg pravilnika koje smo mi, hajde da kažemo, brusili i dosta smo stavili tačaka, raspravljali o njima, čak sam imala i neki prijedlog. Čini mi se da je taj prijedlog i uvršten i jednoglasno smo donijeli taj pravilnik, ali kada sam pogledala ovu rang listu ja sam doživjela razočarenje. Zašto razočarenje? Kažem, ja ću biti za ovu tačku dnevnog reda, ali budući da smo mi mala općina i svi se otprilike znamo ja sam primijetila da je taj naš pravilnik izgubio taj socijalni status, tu socijalnu ulogu kada isključivo govorimo o primanjima unutar te određene porodice koja se dijeli sa brojem članova porodice. Ja koliko znam kada kandidati konkurišu za stipendiju u Tuzlanskom kantonu da se poštuje, nemojte me držati za riječ, 50,60,70% prosječne plaće po članu te porodice, odnosno taj se kandidat eliminiše i sama sam svjedok tome. Bit ćemo iskreni i ja neću licitirati sa imenima, ovdje imamo kandidata koji po tom osnovu koji sam upravo navela po članu porodice možda imaju 800-900 KM, a s druge strane imamo kandidata ispod liste, vjerujte mi znamo gdje ko radi, koji po članu porodice imaju ispod 200 KM. I onda mi gubi smisao i svrhu da je to određena pomoć studentima. Ja razumijem ovaj prioritet i kada je u pitanju prioritet neka bude i 3,4 i 5.000 po članu porodice, jer to je određena nagrada, a sve ostalo po meni treba biti pomoć. U ovom slučaju desile su se određene stvari gdje je ta pomoć nekima izostavljena, a neki koji nisu u istom rangu vidimo da će, ako Bog da, dobiti stipendiju. Dalje, ono što sam na Kolegiju govorila mene načelnik nije razumio. Načelniče, vidite sada se pojavljuje ime, ne licitiram imenom, studenta koji je trenutno zasnovao radni odnos, imaju čak dva studenta i oni će dobivati stipendiju i platu. Pravilno jeste, nije van zakona, ali gubi smisao i treba se poraditi na tome. Vi kažete, predsjedniče komisije, da je u pitanju stipendija na kantonalnom nivou i to mi nije jasno ako su oni već izvršili svoje obaveze upravo u ovoj školskoj godini za 7 mjeseci, a Vijeće će tek idući mjesec, vjerovatno, ovo će se ako Bog da usvojiti.“

Izet Hodžić, zamjenik predsjedavajućeg Općinskog vijeća: „ Kao i svake godine osjećam potrebu kao predsjednik ove komisije koja po meni radi izuzetno korektno svoj posao. Prije svega zahvalio bih se kolegama članovima ove komisije na saradnji i dužan sam da kažem da ni jedna odluka ili zaključak u radu komisije nije donesena preglasavanjem. S ponosom mogu reći da radimo u duhu i u skladu sa važećim propisima, kriterijima i pravilnikom koje je ova institucija, Općinsko vijeće, donijelo. Koleginice, vi imate pravo da diskutujete, a isto tako imate pravo da kažete da li je komisija napravila nekakav previd što se tiče ovih akata kriterija i poslovnika. Nećemo se nikada svi složiti da je nešto idealno, jer ne postoji idealno i savršeno. Tu smo da usavršavamo i da vršimo izmjene pravilnika i svega toga i ja najavljujem da će članovi komisije do raspisivanja sljedećeg javnog poziva predložiti Općinskom vijeću izmjene vezane za taj materijalni aspekt i dokazivanje materijalnog stanja. Znači predložiti ćemo izmjene pravilnika i kriterija i dati na usvajanje. Nije da sada ja to nešto pravdam, nego smo mi procijenili da to treba da tako bude, a na Općinskom vijeću će biti da li će prihvatiti naš prijedlog izmjena ili ne. Ovo zadnje mi nije baš jasno šta ste rekli vezano za kanton. U neformalnom razgovoru vas i mene ja sam rekao, a ponovit ću to i ovdje za govornicom, da smo mi čekali da naši studenti sa područja općine Doboj Istok potpišu ugovore kod Ministarstva za boračka pitanja da ne bi ti studenti ovdje potpisali ugovore, a izgubili pravo gore. S tim smo mi stekli uslov da novih šest studenata dobije stipendiju, 10 je ukupno dobilo stipendiju, a šest je bilo unutar ovih 20. Ne vidim ništa tu sporno i ja sam to obrazložio. Osjećam potrebu da obrazložim i hronološki informišem ovo Vijeće. Kažem da smo radili u slovu i duhu propisa koje je Općinsko vijeće donijelo. Krenut ću redoslijedom i pokušat ću da budem što kraći. Prvi sastanak komisije mi smo donijeli zaključak da uputimo prijedlog Općinskom načelniku, čija je nadležnost, da raspiše javni poziv za dodjelu stipendija za akademsku 2022/2023. godinu. Naravno upućen je taj dopis u načelnik je raspisao javni poziv koji je trajao od 20.03. do 07.04.2023. godine. U tom periodu kako procedura



*nalaže došlo je 45 prijava. Poslije toga je komisija sjela i izvršila bodovanje na osnovu postojećih i važećih kriterija i uvažavajući kriterije da se ne boduju studenti koji imaju prosječnu ocjenu 5,0 za srednjoškolce i 9,0 i više za studente. Objavili smo preliminarnu listu kako je predviđeno na oglasnoj ploči općine Doboj Istok, na web stranici općine Doboj Istok i uputili smo preliminarnu listu svim savjetima, odnosno rukovodstvu mjesnih zajednica sa područja općine Doboj Istok. Preliminarna lista je bila istaknuta 8 dana i nakon isticanja tog roka nismo imali ni jednu zaprimljenu žalbu na tu preliminarnu listu. Takav je postupak, kao i do sada ništa se nije mijenjalo i da je bilo žalbi Vijeće bi se očitavalo, jer u ovom slučaju Vijeće je drugostepeni organ koji raspravlja o pristiglim žalbama. Znači te osobe, studenti, naši mladi sugrađani nisu imali primjedbi na ovu preliminarnu listu. Poslije toga mi smo napravili prijedlog konačne rang liste i uputili Općinskom vijeću na razmatranje i nadam se jednoglasno usvajanje. Što se tiče dinamike isplata tih stipendija ja nisam ni od koga zaprimio nekakvu reakciju i kritiku što se tiče isplate. Hvala Bogu predviđena sredstva se nalaze u budžetu i dinamika tih isplata će ići onim tempom kojim treba da ide. Što se tiče potpisivanja ugovora sa studentima to je nadležnost općinskog načelnika i druge strane studenta kojem je odobrena stipendija i tamo stoji da student treba da ta sredstva da opravdava. Nije dobro ako mi sada nešto improvizujemo ili nešto nagađamo. Znači komisija je radila po materijalima koje je zaprimila i iz vijeća u vijeće ću, što se tiče ove vrste djelatnosti, naglašavati da komisija nije istražni organ, nismo policija ili bilo šta drugo. Imamo tamo izjave da podnosioci tih prijava pod punom materijalnom i krivičnom odgovornošću što se tiče tog dijela dostave tu dokumentaciju i to je to. Jednostavno mi nemamo mandat da nekoga ispitujemo i da nekoga provjeravamo. Sa odgovornošću tvrdim da smo mi radili sa dokumentacijom koja je nama pristigla i da smo izvršili bodovanje i sve ovo što sam vam prije rekao. Još jedanput ponavljam razlog kašnjenja u odnosu na protekle godine je što je procedura na nivou kantona Ministarstva za boračka pitanja malo duže trajala u odnosu na prethodne godine. Ako Vijeće smatra da „politika“ ove komisije nije ispravna ili nije u redu, nije nikakav problem mi ćemo raditi po uputama Općinskog vijeća ili rukovodstva ili Kolegija Općinskog vijeća i to apsolutno nije problem. Ja smatram da puno znači da imamo još 6 studenata koji će dobiti tu stipendiju sa područja općine Doboj Istok, a da je i jedan nama to puno znači. Stojim na raspolaganju ako bude kakvih pitanja i rado ću odgovoriti ako budem znao, pa nemojte postavljati teška.“*

*Senada Džanić, vijećnica SBB: „Kao što ste upoznati iz zdravstvenih razloga u proteklom periodu nisam prisustvovala sjednicama Vijeća, pa tako ni sastanku komisije. Međutim pratila sam tamo na našoj grupi i ja želim svim članovima i predsjedniku komisije da čestitam na stvarno izuzetnom zalaganju kada je u pitanju rad ove komisije. Jako je teško naći formulu gdje ćemo sve ove segmente zadovoljiti, ali nastaviti ćemo kao što predsjednik reče da se radi u narednom periodu. Ovo jest da dvije osobe koje rade sada primaju stipendiju, ali je činjenica da su oni to zaslužili kroz završnu godinu. Ja jesam i za tu socijalnu kartu, ali u jednom segmentu, ne da ona bude osnov. Govorim iz razloga što sam prije dvije godine imala da je kćerka zbog toga odbijena, ali djeca to ni malo ne prihvataju jednostavno. Oni pogledaju stipendiju, pa onaj je slabiji a dobio. Htjela sam reći teško je, ali da bogdom sve radi kao što radi ova komisija onda bi uradili puno puno više.“*

*Emira Karić, predsjednica kluba vijećnika SDP: „Ono što je zaista pohvalno i ne treba sumnjati kada je u pitanju zapisnik pomno ga pročitam i opet kažem hvala Behara zaista si u tome postala velemajstor, da tako kažem. Znači ne treba sumnjati bar za sada, pa ćemo vidjeti šta je dalje. I apropos toga naći ću zapisnik kada je kolega kada sam ja nešto predlagala za Klokotnicu rekao šta se ja borim za Klokotnicu ja sam vijećnik Brijesnice i onda sada dolazimo do kontradiktornosti, ali to smo mi navikli od predsjednika kluba vijećnika SDA. Hvala vam predsjedniče komisije i uvijek tako iscrpno ako je moguće i ako imate snage diskutujte kada je ova tematika u pitanju. Vidim da se zaista dobro radi. Prvo to govori činjenica da zaista nema nikakve negativnosti, niko nije pogrešno nešto rekao o tom radu komisije i to sve govori na kraju krajeva. Vjerujte kod nas je narod uvijek spreman ako uoči neke nepravilnosti da odmah te nepravilnosti na bilo koji način pošalje na neku adresu. Drago mi je što ste najavili, jer mislim ako ste i vi primijetili ono što sam i ja primijetila da će te ispravke donijeti tu neku ravnotežu. Mislim da bi trebalo limitirati ...“*

*Nusret Dautović, predsjedavajući Općinskog vijeća: „Ne razumijem ni ja je li to replika ili nešto drugo?“*

*Emira Karić, predsjednica kluba vijećnika SDP: „Ovo je replika na diskusiju predsjednika komisije. Dobro, izvolite načelniče.“*

*Kemal Bratić, općinski načelnik: „Ja mislim da nema bolje komisije koja radi u Općinskom vijeću. Korektno od vas je bilo da kažete čestitam komisiji na dobrom radu uz ove nedostatke koje iznosite ne ulazeći u srž problema nego bacate pred vijećnicima. Dalje, ove stipendije su za akademsku 2022/2023. godinu, nisu za 2023/2024. godinu. Znači troškovi kod naših studenata su nastali prije. Ako znamo da to počinje negdje od oktobra do juna naredne godine. To je za akademsku 2022/2023. godinu i ne postoji mehanizam da mi*

sada raspišemo poziv za 2023/2024. godinu. Kako ćemo ga raspisati? Nemaju djeca rezultata i o tome se radi. Mi dajemo djeci sredstva jer su troškovi nastali ... Pročitajte molim vas, ovdje lijepo stoji za akademsku 2022/2023. godinu. Od kada do kada traje 2022/2023. godina? Vi to znate, sa socijalnim rokovima oktobar – oktobar. Čestitam predsjedniku komisije na ovako dobrom pravdanju, mada vi predsjedniče nemate se za što pravdati. Za mene je glavno ukoliko nije bilo ni jedne jedine žalbe i to je za mene čisto kao suza. Ko je i kako aplicirao, on odgovara. Ja vas molim predsjedavajući, ako je replika, neka to bude replika. Ako je ponovna diskusija, 800 diskusija, nije problem diskutovati ćemo, ali nećemo do ujutro završiti Vijeće.“

Emira Karić, predsjednica kluba vijećnika SDP: „ Da li je replika, da li je diskusija, dobro, u redu je najaviti. Isto tako po Poslovniku predsjednici klubova imaju pravo na nakoliko diskusija povodom jedne tačke za razliku od ostalih vijećnika. Mislim da nije problem da li je replika ili diskusija ja sam predsjednica kluba, ali eto mogu i najaviti šta je. Ovo sada je bila samo replika.“

Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ? Ukoliko se niko ne javlja, ko je za usvajanje ovakav prijedlog Konačne rang liste?“

Glasanje: ZA – 16, PROTIV – 0, UZDRŽANIH – 0. (Zerina Subašić je odsutna).

#### **4. Razmatranje i usvajanje prijedloga Odluke o dodjeli stipendija redovnim studentima dodiplomskog studija za akademsku 2022/2023. godinu**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Niko se ne javlja. Ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0. (Zerina Subašić je odsutna).

Emira Karić, predsjednica kluba vijećnika SDP: „Predsjedavajući, tražim pauzu od pola sata.“

Nusret Dautović, predsjedavajući Općinskog vijeća: „ Pauza od pola sata na zahtjev predsjednice kluba.“

Sjednica je nastavljena u 12,15 sati.

#### **5. Razmatranje i usvajanje Izvještaja o realizaciji budžeta općine Doboj Istok za period januar-juni 2023. godinu,**

Nusret Dautović, predsjedavajući Općinskog vijeća: „ Javlja li se neko za riječ?“

Mehmed Mehinović, predsjednik kluba vijećnika SBiH-SDP: „ Gospodine predsjedavajući, dopredsjedavajući, želim da poselamim i pozdravim sve prisutne. Dozvolite mi da izrazim svoje zadovoljstvo i drago mi je da vidim ponovo našu vijećnicu Senadu da je došla u vijećničke klupe. Nadam se da je ozdravila i da će prisustvovati sastancima, jer ljepše je sa tobom nego bez tebe. Da malo prekinem ovo, jer mučno je bilo u proteklom periodu i da vam kažem prisutan sam negdje od 2008. godine na Općinskim vijećima u raznim segmentima i raznim zaduženjima i kada je 1998. godine naš poštovani Alija Zahirović bio predsjedavajući bilo je prijatnije. Nadam se da nije ovo predizborna nego jednostavno nismo dugo bili dva mjeseca, pa ljudi hoće da iznesu svoje mišljenje. Počet ću ovu temu izvještaj o izvršenju budžeta na čudan način i to sam malo prije na pauzi zaključio. Negdje 1999. godina je bila, bilo je Općinsko vijeće i bio je izvještaj o izvršenju budžeta, rahmetli moj prethodnik Hasib Subašić je objašnjavajući vijećnicima budžet, a ja sam i u to vrijeme znao budžet i prošao sam sve faze budžeta i prije rata i poslije toga, ja sam ga čini mi se i pravio. Hasib ovako doslovice kaže, prvo da kažem rahmet mu duši i da ga Alah dragi uvede u dženet, zadužio je mene pogotovo, jer naučio sam od njega mnogo stvari. Mislim da je malo ko znao općinsku upravu u Doboj Istoku kao što je znao rahmetli Hasib i doslovice on ovako kaže, citiram ga: gospodo ovo je živa materija. Nikada do tada nisam čuo da je budžet živa materija, a svašta sam znao o budžetu. Kasnije kako je vrijeme išlo ja sam stvarno shvatio da je to živa materija. Kasnije sam shvatio na šta je on mislio da je budžet živa materija i da se može o njoj pričati, da nije zakovana tema. I ja ću iskoristiti priliku, pa ću o njoj pričati, a nije usmjereno ni protiv koga, zaista ovo što ću reći reći ću dobronamjerno. Vjerujem da je definitivno budžet solidan i da je dobar budžet. Onako svoja zapažanja i svoja neka iskustva da prenesem i da ne bude dosadno, pa možda će nekome i koristiti u budućnosti. Ovaj budžet, kao što je rekla i komisija, solidno je napravljen. Višak prihoda nad rashodima je evidentan i ja ću prvo o prihodima. Ostvaren je prihod od skoro 2,5 miliona, a to je bila misaona imenica, jer je 1999. godine budžet bio 340.000 KM, pa možete zamisliti kako je općina Doboj Istok rasla sa budžetom. 340.000 tada, ovo što sam pričao Hasib rahmetli kada je rekao. Mene uvijek interesuje struktura budžeta i

neke prihode ću malo prokomentarisati. U strukturi budžeta mi smo planirali 4.934.000 i to je 100%, od toga potpore 1.360.000 u strukturi učestvuju sa 28%. Porezi učestvuju sa 3 miliona ili 60% i vlastiti prihodi, to su takse, ovo o čemu pričamo, su 12%. Što hoću reći da je općina Doboj Istok održiva sa ovim planom, a to je 72% vlastitih prihoda, a potpore su 28% što omogućuje da se može normalno funkcionisati. Ostvarili smo 373.000 vlastitih prihoda, potpora smo dobili oko 500.000 KM ili 20% i porezi 1.600.000 KM. Potpore, znači nisu pratile ovaj trend koji je planiran, u minusu su za 8 indeksnih poena, dok su porezi rasli za 5%, što je dobro i vlastiti prihodi su rasli za 3%. Znači još bolja je situacija nego što smo mi planirali kada se pogleda struktura budžeta. Hoću ponovo da prokomentarišem, jer još sam jednom za govornicom ovdje rekao, konto 716115 prihodi od poreza na dohodak fizičkih lica na dobitku od igara na sreću. Lijepo je svako prihodi koji legne, ali me ovaj prihodi uvijek zaboli na neki način, jer mogu zamisliti koliko je porodica zaplakalo kod kuće radi onih koji idu da kockaju i koji sve daju kockarnicama i koliko djece možda nije imalo šta jesti, a roditelji su im tamo. Ja to vidim, često hodam i možemo reći da je to pošast u Bosni i Hercegovini i svugdje je takva situacija. Međutim mi se trebamo pozabaviti i ovdje apelujem na boračke organizacije, pogotovo na Centar za socijalni rad da povedu računa, pa evo i Općina. Imao sam prilike da vidim i ne bih licitirao sa imenima, da je čovjek koji je u budžetu za pomoć u liječenju dobio 1.000 KM i izlazi iz kladionice. Postavlja se pitanje je li uvijek opravdano da dajemo i to dobro treba ispitati. Znam da je to teško i ne treba se pravdati, ali trebamo svi voditi računa, pogotovo u izvršnoj vlasti, pa i mi svi ostali. Drago mi je da je skoro ostvaren taj prihodi planiran sa 66%, međutim volio bih da ga nema nikako. Lično kažem volio bih, pa da ni mi nemamo paušala samo da nemamo tog prihoda. Tako je kako jeste, ali nije lijepo što ovaj prihodi raste, ni malo nije lijepo. Od prihoda htio sa prokomentarisati 722132 a na to su me inicirala vijećnička pitanja, administrativne takse za vjenčanja. Mi smo planirali, možda ste zaboravili, 2.400 KM po tom osnovu prihoda, a ostvarili smo sa 1.490 KM. Nije to neki značajan prihodi, ali raspravljali smo i došlo je i do svađa i do prepirke i maltene imputiranja da je to namjerno. Dajte da na sljedećem Kolegiju vidimo administrativne takse da li možemo šta izmijeniti tu, ima li prostora, nema prostora. Opravdana je i jedna strana i druga. I ja sam imao kritika kada sam vjenčavao svoje dijete, hajmo negdje drugo, pa sam platio i čuvam i sada tu priznanicu zbog toga što sam bio u to vrijeme načelnik. Sve u svemu ovi prihodi su jako dobri i žalim da čestitam, neki su išli inercijom. Nije dobro indirektni porezi se malo smanjuju i to baš nije sjajno. To je neki indikator da dolazi do smirivanja inflacije i svi ekonomski stručnjaci govore da dolazi do smirivanja inflacije, iako ja znam da su planirani na preporuku Ministarstva finansija Tuzlanskog kantona, odnosno federalnog ministarstva. Planirani su kako su oni predvidjeli, međutim vidite da je došlo do blagog pada tih prihoda za prvih 6 mjeseci. Kada je o troškovima riječ mene ne interesuje kolika je reprezentacija, kolika je gorivo, kolika je ovo i najvolio bih da je to dobro, a da ima rezultata i da se prebaci 100 ili 200%, to me ne interesuje. Isto tako želim da govorim o strukturi. Vidite da se ponašalo kako treba i da su ostvareni troškovi sa 2.056.000 i u strukturi ulaganja učestvuju sa 23%, konto grupa 820, davanje drugima konta 613, 614 itd. 720.000 ili 35 i općina što je potrošila na plate i ovo što opslužuje općina 850.000 ili 42%, što će reći da općina i davanje drugima učestvuje otprilike sa 77%, a što je otprilike 2/3 budžeta. To je jako dobar pokazatelj i kada bi se zadržao ovaj trend ja cijenim da je to dobro. Jest da je došlo do smanjenja, u planu smo predvidjeli da ulaganja učestvuju u ukupnim troškovima sa 30%, a ona učestvuju sa 23%, ali je došlo do povećanja drugima što dajemo, transferišemo, komunalnom preduzeću, Centru za socijalni rad, sportskim klubovima itd. Može se čovjek ljutiti na nekoga, ali ne može reći da ovo nije dobro. I dalje bez obzira ko je radio da me niko ne ubjeđuje da je ovo transparentno, jer ovo nije transparentno. Ovo odgovorno tvrdim, a spreman sam sa svakim sjesti i razgovarati. Zar ne trebamo znati višak prihoda 401.000 i nama je svima drago što je višak prihoda. Iz čega je nastao višak prihoda, to se jednom rečenicom kaže. Jesu li to neutrošena namjenska sredstva ili su to uštede na nekim stavkama i da znam. Nego ja to slušam da je to suficit, a suficit ne može biti na polugodištu, suficit može biti na kraju godine i ne može biti u izvještaju. Lijepo je to kada se reklamira, međutim da bi bilo transparentno mora se objasniti. Takođe što je lijepo ulaganja u infrastrukturu, skoro pola miliona je uloženo za prvih 6 mjeseci, a obično su ulaganja veća u drugoj polovini, to su takva dešavanja. Onda da znamo otprilike šta je to 470.000, a kažu vidi se. Ja ne vidim, ja ne znam iako želim da znam. Šta je to 470.000? Je li put? Je li kanalizacija? Samo da mogu izaći i ljudima da kažem i iz tih razloga ovo nije transparentno. Ali iz razloga o kojima sam pričao kvaliteta na uštrb kvantiteta i ovo treba podržati i ja ću podržati ovaj budžet, jer je jako dobar budžet. Općina Doboj Istok je sigurna dok je ovakva situacija dok ne dođe do drastičnih padova indirektnih poreza i ovih drugih prihoda.“

Nusret Dautović, predsjedavajući Općinskog vijeća: „Hvala lijepo, Mehmede. Javlja li se još neko za riječ po ovoj tački? Ukoliko se ne javlja ko je za ovakav Izvještaj o realizaciji budžeta?“

Glasanje: ZA – 14, PROTIV – 0, UZDRŽANIH – 0. (Zerina Subašić, Hasan Hasančević i Omer Konjić su odsutni).

## **6. Razmatranje i usvajanje Izvještaja o utrošku sredstava budžetske rezerve za period januar-juni 2023. godinu**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Niko se ne javlja. Ko je za ovakav Izvještaj o utrošku sredstava?“

Glasanje: ZA – 14, PROTIV – 0, UZDRŽANIH – 0. (Zerina Subašić, Hasan Hasančević i Omer Konjić su odsutni).

## **7. Razmatranje i usvajanje Informacije o stanju u privredi u općini Doboj Istok za 2022. godinu**

Nusret Dautović, predsjedavajući Općinskog vijeća: „Stavljam tačku na diskusiju. Javlja li se neko po ovoj tački?“

Mehmed Mehinović, predsjednik kluba vijećnika SBiH-SDP: „Razumijem zaista materijal je obiman da neko nije imao prilike, nekoga ne interesuje, a neko nije stigao da pogleda. Iskoristit ću priliku, predsjedavajući, da uzmem sebi za pravo i obzirom da ovu materiju dobro varim da prenesem neka svoja zapažanja, jer ovo treba znati. Prije svega čestitam obrađivaču i onome ko je ponudio ovakav materijal, jer ovo je zaista jedna studija, ovo nije običan materijal. Ovo je slika Doboj Istoka kada pogledaš budžet o kojem sa pričao i kada pogledate ovo imate sliku Doboj Istoka svi koje interesuje. Nemojte bacati ovaj materijal možete ga čitati i dalje, možete tabele upoređivati i nemojte zamjeriti bit ću kraći ali neke stvari po mom viđenju koje treba da komentarišemo da znamo, jer znam da neko nije ni pogledao. I ja nekada ne pogledam nešto, pa mi drago kada me neko informiše o tom pitanju. Svašta sam nešto tu zapisao, međutim govorit ću iz glave što sam zapamtio. Obično kada se prave ovakve stvari i kada se pravi makroekonomska politika, ona se donosi na bazi, ne može za jednu godinu nego za zadnjih 5 godina, pa i više godina i onda možete donijeti pravilne prijedloge i vidjeti pravu sliku. Kada se srednjoročno planiranje budžeta pravi onda valja posmatrati jedno 5 godina unazad da bi pravilno planirao srednjoročni budžet ili dugoročni budžet, makroekonomska i fiskalna politika kada se pravi. Ovdje je sve tako lijepo napravljeno u ovoj tabeli i ne znam kako su imali vremena sve to lijepo da slože i da napišu. U svakom segmentu imamo rast i imamo nešto što je zabrinjavajuće o čemu ću ja govoriti. Privreda nam dobro radi, stalna sredstva dobra zahvaljujući ovdje vlasniku Emosa, jer znam da je on drastično učestvovao u ovom izvještaju, pa i neki drugi. Neto čista dobit fantastično raste i ovdje možete vidjeti ako vam se neko obrati u šta bi ulagao ako vam dođe sa parama, pogledajte ovdje gdje je najveća dobit, gdje je kakav promet, koliko ko zapošljava radnika i možete čovjeku preporučiti gdje da radi. Sada je trenutno građevinarstvo, saobraćaj itd. to su vrlo atraktivne grane u Doboj Istoku koje obezbjeđuju dosta dobar i čist ostatak dohotka. Da ne bi pričao samo o onome što valja i ono što je mene zabrinjavalo jeste plata. Prosječna plata u Doboj Istoku je 67% od prosječne plate u Federaciji i to je 700 i nešto. Nije u redu. Znam mnogi će meni reći takve su grane kod nas malo je, neko će reći isplaćuje se onako, neko će reći isplaćuje se tačno, međutim padaju sve te pritužbe kada pogledamo kolika je čista neto dobit. Čista neto dobit obezbjeđuje poslodavcima da mogu povećati te plate. Ne mogu reći da im je teško, moraju i oni biti bogati, ali mogu makar dio od te neto čiste dobiti i ja apelujem na njih da usmjere da se ova plata popravi. Ne mora biti 5 miliona ostatak dohotka, ne mora biti 3 miliona njemu i eto od ta 3 bar trećinu da usmjeri i popravi standard radnika i neto plate radnika, jer povećat će se samim tim potrošnja u Doboj Istoku i svi će opet dobiti kroz PDV i svi će se otprilike namiriti. Htio sam da uputim neki apel, jer nije da ne može, neki i ne mogu, to je tačno, ali ovi koji imaju neto čiste dobiti po 5 miliona ili 3 miliona oni mogu itekako. Kada sam dublje ušao u njihove dublje analize vjerujte da nije ni kod njih baš, a da li oni na divlje šta isplaćuju, to neću da kažem iza ove govornice. Međutim ako to rade onda gubimo mi svi i penzioni fond i zdravstveni fond i svi otprilike. Šta fali ovom izvještaju? Neki dan sam čitao, nije ništa tajna, Poreska uprava Federacije Bosne i Hercegovine je objavila dužnike poreza. Možete svi ukucati i vidjeti dužnike poreza. Pazite ima i u Doboj Istoku dužnika poreza koji su otprilike blizu poreskih prihoda budžeta općine. Nije to malo, ne treba se niko ljutiti, to je javno objavljeno i to je podatak koji se može koristiti i konzumirati iz Poreske uprave. Kada bi i to bilo da vidimo, pa da nam makar ne govore mi punimo budžet, mi ovo, mi ono, ma ne punite budžet. Ovo govorim iz razloga da kada se pravi uspješnost lokalne zajednice na federalnom nivou i na kantonalnom nivou koristi se i uplata poreza sa te općine. I rangira općinu Doboj Istok na federalnom nivou koja je po meni dosta solidno rangirana, jest da se popela na 40 mjesto, ali bila je nekada i 30. Bilo bi dobro, jer taj podatak se koristi pored broja stanovnika, pored broja učenika i kao finansije najjači je ponder da općinu Doboj Istok digne na 30 mjesto kako smo bili 2015/16 godine i 2010. godine 35. Imamo zaključke koje svi možete vidjeti porez, uvoz i izvoz. Jako je dobar i od 2010 i 2012. godine zadržan je izvoz i pokrivenost, jest da se više uvozi, ali značajni smo u Federaciji po tom dijelu i kod nas je ta pokrivenost jako dobra. Moja diskusija treba ići u tom pravcu da izvršni

organi vlasti u Doboj Istoku trebaju da budu na usluzi našim privrednicima. Još je i bolje da za njih nema radnog vremena kada im nešto treba, jer svi zavisimo od slike kakva će biti, jer ova slika ide u svijet otprilike, ništa drugo ne ide. Da budemo svi na usluzi, pa i mi Općinsko vijeće, ako treba i vanredna sjednica po nekom pitanju da se riješi da li građevinska, urbanistička, gdje je zapelo nekom, da otprilike i mi shvatimo, jer budućnost, evo govorio sam o padu prihoda, doći će do pada prihoda, budite ubijedjeni da će doći. To znam sa aspekta makroekonomske politike da će doći do pada prihoda sa padom inflacije, ako nešto drugo ne izmisle, a nema se šta izmisliti. Prema tome ova moja diskusija treba ići u tom pravcu da organi uprave, predstavnička i izvršna vlast i dalje budu na usluzi privrednicima, da ih pazimo kao malo vode na dlanu koliko se to može. Ja se izvinjavam imao sam dosta toga da kažem i skratio sam koliko sam mogao, ali sam imao s obzirom na svoje iskustvo i svoje godina da plasiram neke informacije o ovome ako niste uspjeli da pročitate.“

Izet Hodžić, zamjenik predsjedavajućeg Općinskog vijeća: „ Veliki broj stvari je kolega Mehinović rekao. Ono što je evidentno ko je čitao ovu informaciju, ovaj izvještaj Općinske službe za poduzetništvo i finansije mogao je da vidi i vrijedi ga pročitati i par puta koga naravno interesuju ovi parametri koji su navedeni ovdje. Prije svega čestitao bih Općinskoj službi na ovako dobrom izvještaju gdje imamo paralelne podatke iz prethodnih godina, kao i podatke za 2022. godinu. Na klubu Naroda i pravde i na klubu većine ja sam nešto slično rekao da bi ovaj dokument trebao da posluži, da se zadrži i da se čuva. Čak je prijedlog bio da se objavi na zvaničnoj web stranici općine Doboj Istok. Znači po svim parametrima, ne samo da mi ovdje pričamo lijepu priču, to su podaci Poreske uprave. Znači većina podataka je korištena od Poreske uprave, kao zvanične institucije i da je jednostavno tako da je rast broja zaposlenih u odnosu na prethodne godine evidentan, da je rast prihoda u odnosu na prethodne godine evidentan, da je rast novoformiranih preduzeća i obrta u odnosu na ona koja su prestala sa djelatnošću pozitivan i evidentan. Znači svi parametri su tu. Ovo što je kolega Mehinović rekao što se tiče prosječne neto plate na području općine Doboj Istok to je pokazatelj. Znači mi dugi niz godina i mogu se tu tražiti razlozi, vjerovatno u drugačijoj smo mi situaciji nego općina Gračanica i Tuzla gdje su administrativna središta javnih preduzeća, a plate javnog sektora normalno ulaze u prosječan lični dohodak i taj indeks normalno da raste. Kao pojedinac ja se iskreno nadam da će ovi zakonski prijedlozi koji su na nivou Federacije još u obradi i koji dolaze pnako kao konzumenti tih informacija, nama kao informacija od 01.01. naredne godine, da bi trebali popraviti tu sliku što se tiče i tog dijela, znači povećanja neto plate kako u prevashodno realnom sektoru, tako i u javnom. Ja sam jednostavno osjećao potrebu i najviše sam se zbog toga javio, jer je većinu tih stvari koje sam mislio da kažem rekao je kolega Mehinović, da čestitam službi, čestitam svim privrednicima općine Doboj Istok. Iskreno govoreći oni su nosioci tog dijela, a kažem i administraciji na čelu sa općinskim načelnikom općine Doboj Istok. Bar do mene ne dopiru informacije da je bilo nekakvih barikada ili smetnji prilikom realizacija što se tiče nekakvih dokumentacija i svega ostalog u privrednoj djelatnosti. Kao što Meho kaže da i Općinsko vijeće može dati, a i dajemo svoj doprinos kada izglasamo tačku dnevnog reda ako je u interesu privrede za pretvorbu zemljišta ili zamjene zemljišta i svega toga. Možda nekada nismo svjesni svog učešća u tim aktivnostima, ali dajemo određen doprinos da zadržimo prije svega naše radnike, naše građane na području općine Doboj Istok s tom pozitivnom praksom i pozitivnim primjerima. Mislim da mi nismo dobivali na Vijeće nekakve prigovore i žalbe, a ni privatno ja se nisam sreo sa tim. Naravno da može sigurno uvijek bolje i trebamo slijediti primjere općina koje su ispred nas, pozitivnu praksu tih općina. Kažem sama činjenica da smo dobro rangirana općina po pokazateljima privrednog rasta i razvoja u odnosu kada pogledamo te tabele gdje su druge općine sličnog nivoa po broju stanovnika i po površini. Odmah da kažem po razvoju privrede nisu, bile su ispod nas i meni to imponuje i drago mi je prije svega što sam jedan dio ove općine. Kažem čestitke svim akterima.“

Kemal Bratić, općinski načelnik: „ Evo i ja ću par rečenica, jer su većinu moje diskusije uzeli prethodnici koji su diskutovali prije mene. Ja želim da nam čestitam svima, jer smo makar malo zaslužni za ovaj rast ili kao što neko reče nismo bili kočnica, pomagali smo, otvarali vrata i stajali na raspolaganju. Ono što mene posebno raduje i ja to stalno iza ove govornice govorim jeste da stalno iz godine u godinu raste prihod vezan za dohodak i on je već dostigao nivo prihoda od indirektnih poreza. To je ono što je naš zadatak i to je ono što mi trebamo raditi. Mi smo vama svima iskopirali ove socioekonomske pokazatelje koji se rade svake godine i mi smo već odavno prešli u općine koje nisu ni nerazvijene ni izuzetno razvijene i to je naš cilj i naš zadatak. Kada pogledamo druge općine našeg ranga, kao što je prethodnik rekao, koje se nalaze na dnu tabele po ovim pokazateljima onda svi mi treba da budemo ponosni, jer smo dali, kao što neko reče, nekakav doprinos da to ne bude tako. Drago mi je da ćemo se svi na kraju složiti da su ovo pokazatelji i naravno iz Poreske uprave ova 2023. godina će biti još bolja, jer ima najava da će čak 10-tak miliona biti promet veći što nije zanemarivo. Govorimo o našoj privredi koja stalno raste i koja se stalno razvija i iz godine u godinu sve više i više jača. Ja naravno želim da čestitam našim privrednicima na njihovoj poduzetnosti, na njihovoj hrabrosti, na njihovom umijeću, na njihovom znanju i na svemu onome kroz šta oni prolaze. Mi doprinosimo ovom tačkom koja će biti iza ove da pomognemo ljudima da otkočimo. Nismo mi bili kočnica, bio je neko drugi, pa smo ovako morali

reagovati. Kada se radi o ličnim dohotcima i o ovom prosjeku, ja sam to javno rekao na televiziji, nije politički mudro da ja to kažem, jer možda ću biti kandidat opet nekada, ali sam rekao da bi bilo dobro da se plate povećaju. One se povećavaju, vjerujte, ja imam podatke, jer svakodnevno sjedim sa našim privrednicima. Šta je naša nesreća? U sumi ovih uposlenih koji su na području općine Doboj Istok negdje 10 – 15% nosi ovaj sektor, javni sektor, a ostalo je realni sektor. Ne možemo mi to stići i to je dobro. Zato mi imamo ove pokazatelje prihoda od poreza na dohodak i stalno će oni rasti. Ljudi će morati povećavati, jer niko više neće naći radnika za 500 – 600 KM. Nema šanse. Ni sada nema ni jednog na području općine Doboj Istok koji radi za taj novac. Kako oni to plaćaju, ja ne znam i ne ulazim u to, to je posao nekog drugog organa koji treba da radi, da provjerava i da se bavi time. Činjenica je i vidjet ćete da nije bilo korone da bi mi bili na toj ljestvici i da bi vrlo malo ljudi htjelo da radi u javnom sektoru, radili bi svi u ovom realnom sektoru. Brzo ćemo mi to doživjeti da će nam biti teško naći da ljudi rade u poštama u ministarstvima u nekim drugim institucijama i da će svi željeti da rade u realnom sektoru, jer to je sektor koji proizvodi novac. Kada se radi o ukupnoj zaposlenosti, ja sam presretan da je samo jedan više zaposlen u '22. u odnosu na '21. a kamoli ovaj broj koji je ovdje prikazan. Ponavljam, mislim da će 2023. godina biti još bolja, jer ljudi su u 2022. godini bili onako malo oprezniji i radi korone i radi ovih dešavanja u regionu, tako da je '23. na neki način otkočena. Samim tim i ovaj pokazatelj prometa naših privrednika govori da je još više novca na neki način zarađeno ili izvršen promet na području naše općine. Porast registrovanih da li obrta, da li preduzeća za nekih 30 takođe nije mala stvar za naš prostor. Znači to opet pokazuje da mi imamo izuzetno kvalitetne ljude, izuzetno stručne ljude, izuzetno hrabre ljude da se u ovakvom vaktu odlučuju da pokreću biznis. Želim prije svega da čestitam našim privrednicima na onome što su uspjeli, jer ovo je najviše njihova zasluga. Ne čestitam službi niti bilo kome ko je ovo obradio, stavio na kamaru i prezentovao, čestitam prvenstveno našim privrednicima, jer oni su nam obezbijedili da smo mi na neki način ponosni i naravno čestitam svima nama što smo dali jedan mali doprinos da oni nemaju smetnji i da im pomognemo tamo ono što je naša nadležnost.“

Mehmed Mehinović, predsjednik kluba vijećnika SBiH-SDP: „Sada kada sam sjeo malo sam se zanio, pa sam zaboravio jednu jako bitnu stvar da vam kažem iz ovog izvještaja. Ko je to sročio, zaista je znalački sročio, jer neko je morao napraviti rezultate, a mogli su ovi rezultati biti ne prezentovani nama, pa ih ne bi ni znali, prošlo bi pored nas i gotovo, kao što mnoge stvari prođu. Podsticaji – htio sam da prokomentarišem da je zaista napor napravljen i organa uprave i svega da federalni, kantonalni i općinski podsticaji imaju skoro 1.800.000 u prošloj godini. Ja sam analizirao jesmo li imali efekata od tih 1.800.000 što je bilo, sam sebe pitam. Pogledam koliko je toga, a zatvoreno je nekih privrednih gazdinstva što su dobili podsticaje, vidim ih 9 koji su zatvorili svoju djelatnost. Ako smo postigli prave efekte za 1.800.000, jer 1.800.000 za mene nije malo, jer to su poreski prihodi otprilike naše općine. Nije malo, građani su dobili te novce, pa i to je nešto čime se možemo pohvaliti. Treba povući 1.800.000, a ja znam da je to posve teško i ako ništa treba obraditi te materijale da se pošalju ispred općinske službe. Nema nikog iz privrede da mi objasni, nije ni bitno tražit ću sam za sebe odgovor, ako smo postigli rezultat da su ljudi zadovoljni i da su plasirali svoje proizvode, da su proširili stočni fond, bit će izvještaj, vjerovatno, Veterinarske stanice, pa ćemo vidjeti, pa ako je imalo proširen stočni fond, dobar je posao napravljen. 1.800.000 je došlo prošle godine u vidu podsticaja na općinu Doboj Istok. Budžet – porezi. To je meni drago i ja sam htio ovo pohvalno da kažem, ali evo ispustio sam, a trebao je da bude segment u mom izlaganju, ali evo da i to znate ko nije pročitao.“

Emira Karić, predsjednica kluba vijećnika SDP: „Ja bih se samo nadovezala i govorila bih generalno o situaciji u Bosni i Hercegovini kada su u pitanju ti podsticaji. Gledam i neke emisije i nešto čitam i mislim da sami podsticaji ne služe u svrhu donagradnje te poljoprivrede ili već kojoj grani su ti podsticaji usmjereni iz razloga što naši poljoprivrednici imaju velikih problema, jer zapravo oni sa tim podsticajima rješavaju te nagomilane probleme. Smatram da će ti podsticaji imati efekta kada bude taj zakon koji će biti sveobuhvatan i ići u prilog tim poljoprivrednicima. Najviše je u pitanju na vrijeme određivanje nekih tržišnih cijena. Ne da nešto sada branim, zaista bih voljela što više podsticaja i tu granu nikako ne smijemo zanemariti, ali isto tako morat će i na višim nivoima da o tim stvarima itekako vode računa.“

Nusret Dautović, predsjedavajući Općinskog vijeća: „Javlja li se još neko za riječ po ovoj tački? Ukoliko se niko ne javlja ko je za ovakvu informaciju o stanju u privredi?“

Glasanje: ZA – 15, PROTIV – 0, UZDRŽANIH – 0. (Zerina Subašić i Hasan Hasančević su odsutni).

## **8. Razmatranje i usvajanje Informacije o uspjehu sportskih klubova u takmičarskoj sezoni 2022/2023. godina,**

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

*Kemal Skopljak, predsjednik kluba vijećnika BPS-SBB: „ Pošto prvi puta izlazim selamim i pozdravljam sve prisutne. Izašao sam sa jednim velikim razlogom. Pošto sam dugo godina sportski radnik i razumijem problematiku sporta u Doboj Istoku i želim ovom prilikom da se zahvalim i da čestitam svim upravama ovih 12 klubova i svim trenerima na uspješno završenoj prošloj godini. Znači za ovako malu populaciju, oko 10-tak hiljada stanovika, lijepo je kada vidim da imamo konstantno iz godine u godinu reprezentativce Bosne i Hercegovine i nema boljih ambasadora od ovih naših sportista koji predstavljaju našu općinu, pa i vani. Znači ljudi koji rade, a svi mi znamo da oni nisu profesionalci, da oni rade amaterski ili poluamaterski. Iz ovako male sredine izvući ovoliko dobrih sportista je umjetnost. Znači, još jedanput, neću nikoga ovdje da izdvajam posebno da ne bi nekoga uvrijedio. Svima njima čestitam na ovom uspjehu. Kada gledamo oko nas Malešići klub koji je bio prva federalna liga i Mramor klub koji je bio prva federalna liga gase se ti klubovi. Jednostavno se gase i nestaju. Želim da istaknem ovdje još jednu stvar da je vjerovatno doprinio uspjehu i ovaj finansijski poticaj koji se daje Sportskom savezu. Nije mala svota od 77.000, a nekada je to bilo 40.000, a evo došli smo i do 77.000 KM. Znači i to je jednim dijelom uticalo na kvalitet našeg sporta. Što se da primijetiti u posljednje vrijeme da je težište bačeno, ja sam diskutovao ovdje i tražio i zahtijevao da se baci na mlađe populacije na djecu, na juniore i na rad sa njima. Evo vidimo u Brijesnici Velikoj pokrenut je taj trenažni proces, ovdje u Klokočnici takođe ima taj trenažni proces što je u svakom slučaju za veliku pohvalu.“*

*Mehmed Mehinović, predsjednik kluba vijećnika SBiH-SDP: „ Neću dugo predsjedavajući, ali imam potrebu da malo ovo prokomentarišem s obzirom da sam u svoje vrijeme bio i sportski radnik regije Doboja i živo sam zainteresovan za sport u Doboj Istoku. Mogu reći kada sam analizirao nekada vrijeme od 2010. godine, pa do današnjih dana stavka koja je najviše rasla u budžetu je otprilike vezana za sport. Znači da je orijentacija ove vlasti bila u tom pravcu i nisam rekao da je trebalo zakovati u ovom iznosu, ali je imala značajan rast od 2010. godine do današnjih dana. Mislim da je Sportski savez opravdao svoje postojanje ovdje iako sam imao lično nespornost i mene su onako otprilike degradirali, nisu jedini i halalim i njima, kao i ostalim osim nekih ljudi. Na kraju oni kažu moramo izraziti nezadovoljstvo pristupom pojedinih klubova kada je u pitanju slanje izvještaja, odnosno informacija o radu Sportskog saveza općine Doboj Istok. Pojedini klubovi olako shvataju jednogodišnju obavezu izvještavanja institucije koja je glavni finansijer svih njihovih aktivnosti, ali ipak tu činjenicu stavljaju na stranu i na vrijeme ne dostavljaju svoje izvještaje. Na stranu ono što je naš kolega Kemal Skopljak pričao, svaka čast, sve je volonterski i sve se radi volonterski, međutim moraju ljudi shvatiti kada se prihvate te obaveze da moraju biti i društveno odgovorni. Sada sam pričao da u jednom pravcu imamo da je općina otprilike intervenisala sa značajnim sredstvima i ko prati budžet, stalno to raste i vjerovatno ćemo iduće godine pratiti, jer rezultati su dobri. Ne može se dozvoliti da dođe na Općinsko vijeće izvještaj sportskog kluba da nema zaglavlje, da nema pečata. Ovo je tako smiješno ko je čitao. Svaka čast njima što to oni rade volonterski, ali hajde da ne prozivam nikoga uzmete sami pa pogledajte. Ima tu časnih izvještaja kao što je SPIN, kao što je jiujitsu, aikido, ali ovo što je Sportski savez mapirao hoću da podvučem da su 100% u pravu. Nije malo para što se daje iz budžeta i imaju obaveze prema Sportskom savezu da budu fer, jer ako se prihvatio te obaveze da bude fer. Hvala njima što oni vode klubove, hvala na rezultatima i sve je to ok, ali može se napraviti izvještaj, to je 5 minuta ili zamoli Osmića de prekucaj napisao sam rukom i uradit će mu to. Nema zaglavlja u izvještaju, nema pečata, nema potpisa, a da ne govorim upravni odbor da je usvojio taj izvještaj, da ne govorim o tome. Prema tome ja sam stvarno ljut, jer to je velika neozbiljnost, uz sve njihove dobre rezultate to je jako neozbiljno, jer je očito kroz izvještaj se vidi da Sportski savez radi i da je to dobra stvar i da Općina komunicira sa njima. Treba sa njima održati sastanak, a evo imamo predstavnika Sportskog saveza i skrenut im pažnju na ovo. Ja znam da će već danas otići da Mehmed Mehinović i slobodno recite da sam ja diskutovao, nije nikakav problem. Ja realno govorim, jer su ovi izvještaji smjehurija i ja ću ih sačuvati, pa ih mogu pokazati.“*

*Emira Karić, predsjednica kluba vijećnika SDP: „ Vrlo ću kratko. Dakle, privreda, sport, kultura su teme koje bi trebale biti broj 1. u našim glavama i tokom dana i tokom sedmice i tokom mjeseca. Politika je nešto što trebamo staviti dobro iza. Pohvaljujem naravno sve klubove. Isto tako želim da se još veća saradnja ostvari sa omladinom, sa djecom itd. i smatram da bi trebala biti još bolja promocija u školama. Neću načinjati jednu temu, jer mislim da nas počinje sustizati u obrazovanju mnoga problematika. Jedna od stvari koja može riješiti tu problematiku je uključivanje što više djece u sport. Ja zaista, ne da vršim istraživanje, ali na osnovu iskustava vidim koliko su djeca drugačija, ne drugačija nego poboljšaju svoje i ponašanje i kvalitet kada se uključe u određeni sport što je naravno normalno i što treba preferirati. Trebamo i mi u prosvjeti dosta raditi da na roditeljskim sastancima imamo prezentaciju, da se sa Sportskim savezom uvežemo, da znamo šta ćemo prezentovati itd. Znači predlažem da bude još bolja saradnja i sa srednjom i sa osnovnim školama. Ja mislim da neće biti problem i nama izdvojiti određeno vrijeme i da će menadžment dozvoliti i da ćemo na taj način*

pokušati što više djece uključiti, a isto i da ponudimo određene olakšice kada je u pitanju budžet općine Doboj Istok.“

*Kemal Bratić, općinski načelnik: „ Da li treba ovo ozbiljnije, treba, slažem se. Slažem se da je ovo na neki način ponižavanje Općinskog vijeća i kompletne uprave i sugeriše predstavniku saveza da na sljedećem sastanku upozna predstavnike klubova da to treba malo ozbiljnije uraditi. Zašto sam izašao? Pored ovih sredstava koje dajemo redovno, znači tranše svaki mjesec, želim da znate, a vi to vjerovatno već znate, da mi pored toga dajemo i dodatna sredstva našim klubovima i fudbalerima i stonoteniserima i karaterima i svakome onome ko na neki način nema dovoljno sredstava da ode na takmičenje, da li je to evropsko prvenstvo ili neko drugo prvenstvo. Pomažemo još na raznorazne načine, tako da se tu otprilike može dodati jedna solidna cifra, jedan solidan iznos. Evo neki dan smo prebacili i jednom i drugom nogometnom klubu po 2.000 KM i to su na neki način najskuplji sportovi, fudbalski klubovi. Ja to shvatam i dobro će biti ako se na tome završi, ako opet ne zapne da im treba nekakva pomoć. Pomagat ćemo, ali je zbilja neozbiljno da pored sve naše dobre volje i naših pruženih ruku da neko pošalje ovakav izvještaj. Bilo ko, a ima ih dosta, jer više od 50% je to na neki način uradilo. Možda ljudi nemaju vremena i ja neću ulaziti u detalje, ali evo predstavnice saveza zamoli ih da to malo drugačije ubuduće rade, jer nije teškom potpisati se i udariti pečat, jer svi oni imaju i potpise i pečate. Mi trebamo i u narednom periodu povećavati ovaj iznos i ja vjerujem da ćemo za idući budžet još više povećati i stalno ćemo ga povećavati, jer ne možemo nikada dati dovoljno sredstava koliko je potrebno našem klubu. Imali smo nekada takmičenja stonotenisera, pa je trebalo dodatno, pa smo imali takmičenja karatera i imamo stalno problem sa fudbalskim klubovima kojima uvijek, kako su mi rekli, treba oko 1.000 KM za jednu nedjelju, za jednu utakmicu na strani. Trebamo svi pomagati, ali bilo bi dobro da oni to malo bolje cijene i ovdje je mjesto gdje o tome trebamo govoriti, a ne negdje drugo. Podržavam svu ovu prethodnu diskusiju da treba malo te stvari promijeniti i da bude međusobno uvažavanje, jer ako ga ne bude neće biti pomoći. To ja odavde poručujem svakome klubu ako ne bude međusobno uvažavanje nema pomoći ni jednom klubu.“*

*Izet Hodžić, zamjenik predsjedavajućeg Općinskog vijeća: „ Jednostavno osjećam potrebu da se javim. Prije svega da prokomentarišem ako me dobro pamćenje služi i ne želim apsolutno da budem pogrešno shvaćen i ne stavljam se na stranu izvjestioca ove informacije o rezultatima u takmičarskoj 2022/2023. godini. Čini mi se da u martu i aprilu dobijamo izvještaj o radu udruženja građana, pa su tu i sportski klubovi. Nije tako. Oprostite onda. Znači ovo je jedanput godišnje izvještavanje i to je to. Čestitam i veliko hvala sve i jednom čovjeku, sve i jednoj osobi koja je u bilo kojem sportskom klubu na području općine Doboj Istok. Iskreno od srca čestitam, jer znam koja su odricanja ko je ušao srcem da to radi. Znači sigurno bez tih ljudi i bez ove potpore općine i drugih ljudi i drugih institucija koje pomažu, mjesnih zajednica, privrednika, sponzora i svega ostalog sport na području općine Doboj Istok ne bi bio ovakav kakav jest. Po meni su vrlo dobri rezultati i zadovoljavajući za ovako malu sredinu. Sinoć sam gledao skupštinu jednog kantona koji nije naš kanton i vjerujte kada sam čuo činjenice koje je jedan zastupnik iznio nisam mogao da vjerujem. Znači govori se o kantonu, nije ni tajna, Unsko-sanski kanton, znači o kompletnom kantonu da nemaju ni u jednoj grani sporta premijerligaša, da nemaju ni jednog fudbalskog terena da se može igrati premijer liga itd. Znači nemaju ni jednog reprezentativca Bosne i Hercegovine u bilo kom sportu. Mi treba onda da budemo ponosni ovdje. Znači imamo reprezentativce, imamo balkanske prvake i imamo prvake Bosne i Hercegovine. Nije mi svejedno, ali kapa do poda i treba da budemo ponosni. Normalno da ne možemo i nećemo nikada imati premijer ligaša u nogometu ili meni bliže fudbalu, u tim timskim sportovima. Imamo taj malonogometni klub koji se takmiči u prvoj ligi federacije, ali ovim pojedinačnim sportovima kapa do poda, a naravno i nogometnim-fudbalskim i svim ostalim. Iz diskusije iz raspoloženja ja sam vidio da će otprilike ići povećanje u izdvajanju u budžetu u narednoj budžetskoj fiskalnoj godini i normalno da ljudi u tim klubovima treba da opravdaju podršku što se tiče tog dijela. Treba možda skrenuti pažnju, jer uradili smo nekada urnek što se tiče izvještaja udruženja građana kako treba da izgleda. Ne košta nas puno, finansijski ništa, a možda bi dobro bilo da predložimo da neko to uradi ili služba ili Sportski savez. Nije to obiman, nije to zahtjevan posao, znači urnek izvještavanja koji segmenti trebaju, rezultati, omladinske kategorije, koliko imamo djece registrovane, koji su uzrast, takmiče li se djeca i sve ostalo. Ovo što je Emira govorila to je posebna priča i možda ne bi škodilo da mi vijećnici izdvojimo malo vremena da održimo na tu temu i tematsku sjednicu o učešću škola, institucija obrazovanja, sa sportskim klubovima i da damo taj doprinos, ulaganje i investiranje. Kemal je dobro rekao, a svi mi to otprilike znamo, neko malo manje, neko malo više. Znači investiranje u omladinski pogon bilo kojeg sporta, bilo kojeg kluba je sigurnost za, neću reći za rezultate, za opstanak tog kluba. Najviše sam fokusiran na fudbal i one sredine koje nemaju omladinskog pogona, a to se u praksi potvrđuje, one su osuđene na gašenje. Ne opstaju, nema ih, jer jednostavno ekipe koje uvoze fudbalere, nogometaše, igrače iz okolnih ili drugih sredina nemaju budućnost, nemaju perspektivu. Nisam ja to izmislio, to se u praksi pokazuje.“*



Mehmed Mehinović, predsjednik kluba vijećnika SBiH-SDP: „ Ja vidim otprilike kako je moja diskusija protumačena. I ja sam rekao svaka čast njima svima, međutim ja sam stao u zaštitu Sportskog saveza, jer je Sportski savez markirao gdje je problem i neki su to shvatili. Ja smatram da nije teško da stavi pečat i da stavi zaglavlje o kome se radi i kako se radi. To je podcjenjivanje mene, ako vas nije, mene jest podcjenjivanje da dobijem takav materijal, izvinite, ko ih za što, mogu ja njima kako hoću, ali nije tačno da može kako hoće. Pored toliko sredstava, pored tolikog rasta i ja nisam rekao da je ovo dovoljno, ali sam rekao da je bio rast i znam da ide još mimo ovih sredstava i znam kako ide i gdje ide. Bio sam ja načelnik, mimo ovog se daje još i ja to vrlo dobro znam. Prema tome imaju obavezu i hoću da zaštitim Sportski savez da kažem da je Sportski savez u pravu 100% da se malo pobrinemo. Znam ja da oni njima kopaju kada češ vidjeti sa načelnikom, trebaju pare, daj ovom, daj ono, a ne može poslati izvještaj kako treba, ko ih zašto šiša. E nije ko ih zašto šiša, napravi izvještaj kako treba.“

Nusret Dautović, predsjedavajući Općinskog vijeća: „ Javlja li se još neko za riječ? Ja sam razumio da su sve diskusije u jednom pravcu i mislim da su sugestije dobre i uz ove sve sugestije da idemo na usvajanje ove 8. tačke. Ko je za usvajanje Informacije o uspjehu sportskih kolektiva?“

Glasanje: ZA – 15, PROTIV – 0, UZDRŽANIH – 0. (Zerina Subašić i Hasan Hasančević su odsutni).

#### **9. Razmatranje i usvajanje Informacije o provedenim aktivnostima povodom obilježavanja Dana brigade**

Nusret Dautović, predsjedavajući Općinskog vijeća: „ Javlja li se neko za riječ? Niko se ne javlja. Ko je za ovakvu Informaciju?“

Glasanje: ZA – 15, PROTIV – 0, UZDRŽANIH – 0. (Zerina Subašić i Hasan Hasančević su odsutni).

#### **10. Razmatranje i usvajanje prijedoga Zaključka o davanju saglasnosti Elektroprivredi BiH za postavljanje niskonaponskog voda u javnu površinu.**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Niko se ne javlja. Ko je za ovakav prijedlog?“

Glasanje: ZA – 15, PROTIV – 0, UZDRŽANIH – 0. (Zerina Subašić i Hasan Hasančević su odsutni).

Zahvaljujem se svim prisutnim i vijećnicima i ostalim kolegama, završavam sjednicu.“

Sjednica je završena u 13,15 sati.

ZAPISNIČAR  
Behara Hadžić

OVLAŠTENI DRŽAVNI SLUŽBENIK  
DA OBAVLJA POSLOVE SEKRETARA OPĆINE  
Arnela Aljić

PREDSJEDAVAJUĆI  
OPĆINSKOG VIJEĆA  
Nusret Dautović

Zapisnik je usvojen na 30. redovnoj sjednici Općinskog vijeća Doboj Istok održanoj dana 26.10.2023. godine.

U Klokočnici, dana 26.10.2023. godine

Zabilješku sačinila  
Arnela Aljić, ovlaštenu državnu službenicu da  
obavlja poslove sekretara općine